

---

**“Хаётимиз гули, офтоби - аёл” номли байрам тадбири ташкил этилди**  
Бағдод туманида 8 март - Халқаро хотин-қизлар куни муносабати билан “Хаётимиз гули, офтоби - аёл” номли байрам тадбири ташкил этилди.

Турли соҳаларда ҳалол меҳнат қилиб, муносиб обрў-эътибор қозонган фидойилар, дуогўй онахонлар ва лобар опа-сингилларни файзли дастурхон атрофида жамланган тадбир аввалида туман ҳокими Юсуфжон Хусаинов байрам билан барча мунис ва мўътабар аёлларни қутлади.

- Аввало, сизларни, сизларнинг тимсолингизда мўътабар онахонларимиз, мунис опа-сингилларимиз, дилбар қизларимизни эзгулик ва гўзаллик байрами 8 март — Халқаро хотин-қизлар куни билан туманимиз фаоллари, кенг жамоатчилик номидан самимий муборакбод этаман! Биз бугун ўзининг фидокорона меҳнати, эришган улкан ютуқлари, давлат ва жамоат ишларидағи фаол иштироки, ибратли фазилатлари билан халқимиз ўртасида обрў-эътибор қозонган кўплаб опа-сингилларимизнинг номларини ҳурмат билан тилга оламиз. Баҳорнинг илк байрами муносабати билан туманимизнинг дилбар, фидойи ва меҳрибон хотин-қизларига шуни алоҳида таъкидламоқчиманки, Сиз ҳар жабҳада илғор, ташаббускор, ибратлисиз, – деди туман ҳокими ўз сўзида.

Тумани ҳокимлиги томонидан ташкилланган тадбирда қатнашган аёлларга байрам совғалари тақдим этилди.

Тадбирнинг бадиий қисми барчага байрамона кайфият улашди. Элимиз суйган санъат усталари, таниқли хонандалар, туман маданият ва туризм бўлими ходимлари ижросида янграган қўшиқлар армуғони гўзаллик ва нафосат соҳибалари учун чинакам тухфа бўлди. Иқтидорли ёшлар муқаддас аёл, мўътабар она, обод Ватан ва истиқтолимизни мадҳ этувчи тароналари билан даврага файз бағишилади.

**Бағдод тумани ҳокимлиги Ахборот хизмати.**

2023-03-07 18:45:16